



# FENJERAŠI

## (Ili dvojka Dvojci, a po mogućnosti i ostalima...)

**T**aman kad pomislim (nervirajući samu sebe kako nikada da dođem pameti...) da ružnije, gluplje i bezobraznije ne može, život, personificiran u liku *Broja Dva*, me demantira. Recimo, pomislite da ne može gore od revolucionarne konferencije za štampu na kojoj izvršna vlast dijeli lekcije sudskoj šta, kako, kada i protiv koga treba suditi, kada shvatite da je to samo uvod u revolucionarno doscipliniranje sudova koji od sada, nadalje i ubuduće imaju suditi kako to revolucionarna pravda zahtijeva. Pravda je, naravno, oličena u liku *Broja Jedan*, a ako on nije pri ruci onda je tu, logično, *Broj Dva*. A sve to je, ako vam nije jasno, u funkciji gradana, jer ćemo ovako uštedjeti velika sredstva - šta će nam sudovi. Kome još treba taj reakcionarni mehanizam pored živih revolucionara.

I radi koncept, radi. Kako drugačije objasniti da *Drug Dva* bude kažnjen zbog sukoba interesa simboličnom kaznom koju pokrije dio mjesecne plaće *Broja Dva* i po tj. brata dotične *Dvojke*. I nije to ništa čudno. Jer, ako je nešto ostalo u kolektivnom pamćenju ovog naroda onda je to svjesnost da *Drugovi* rijetko zaboravljaju i nikada ne opraštaju. A kad još dodate tome da je revolucionarna pravda brza (posljedično i kusa, ali koga to u ovoj zemlji sekira...) onda većina (a to su oni s manjkom kalcija - u kičmenom stubu posebno) brzo usvoji staru taktiku po onoj narodnoj – veži konja gdje ti aga kaže...

Ili, kada dotična *Dvojka* mrtvo-hladno izjaví da se on ne osvrće na sitnice tipa "Ima li ili nema ovlaštenja da nešto uradi kada je u pitanju interes naroda..." A interes naroda, a time i "revolucionarnu zakonitost" određuju *Drugovi*, a ne tamo nekakve sudije na osnovu nečega što su definirali Rimljani, ti stari "reakcionari i imperijalisti", a što se zove, čini mi se, pravo. Naime, pravo toliko rijetko viđam da sam mu i ime zaboravila.

U međuvremenu, sve ostalo je isto samo *brže, više, bolje*. Još se zadužujemo na svim razinama vlasti - ali *brže*. Razine još lažu narodu da se može živjeti, a da se ne radi - samo ako su dotični na vlasti- samo *više*. I pošto ovo sve ide nizbrdo, to naši *Drugovi*, od *Druga Jedan* pa do *Druga n*, spremaju zalihe za duge, crne i teške dane koji neumitno dolaze - samo *bolje*. Dakle, oni svaki dan u svakom pogledu sve više napreduju. A nama je u skladu sa onom (nad)realnom - tražili ste-izvolite...

P. S.

U međuvremenu nemojte biti u zabludi da oni nose *Fenjer* zvani *Vlast* s namjeron da nas uvedu u bolje i kvalitetnije sutra. Oni su, ako niste već primijetili, slijepi, a taj *Fenjer* služi samo da ih neko u ovom mraku ne udari. A kad se *Fenjer* u ovoj balkanskoj krčmi ugasi, a ugasit će se, onda... **B**

Aida Delić,  
glavna i odgovorna urednica